

Segunda carta de San Pablo a Timoteo

Timoteore Pablo ĩ papera cõare gaye

¹⁻² Ñati yu baba Timoteo m̄. “Quenajaro”, ya yu mure. Yu ña Pablo. Adi papera mure cõa yu. Jesucristo ĩ cūru ña yu. Jane mejeju ado bajiro yicāyiju Dios: “No yu Macure tuorũnr̄areti ĩna catitĩnaroca yigu yigujaja yu”, yicāyiju Dios. Iti oca yu riaso ucutoni yure cūñi Dios, ĩ ãmoro bajiroti. Tuoya Timoteo m̄. Mure buto tuo maicõri yu macure bajiro mure tuoia yu. Mani Jacu Diore mure yiari seni ĩsotia yu. “Ī queno ñaroca yiya. Īre ti maiña ito yicõri ñe oca manoti ĩ ñaroca yiya”, yi Diore seni ĩsotia yu mure yiari. Ito bajiroti manı Ŭju Jesucristore cuni seni ĩsotia yu mure yiari.

Masare Cristo oca goti batoya, Pablo ĩ yire gaye

³ Yu ñicusabatia Diore ĩna r̄c̄ub̄uoado bajiroti r̄c̄ub̄uoa yu cuni. “Yu ñeñaro yirisere coe jeoñi Dios”, yi tuoĩacõri ĩ tiro riojo queno ĩre moa ĩsia yu. Ŭmua ñami cuni mure yiari Diore seni ĩsotia yu. Mure tuoia bujacõri, “Queno ya Dios m̄”, yisotia yu ĩre. ⁴ Yu wacati rumu m̄ oticati masia yu. Mucana mure buto ti ãmoa yu queno wanu quenarocu. ⁵ “Cristore queno tuorũnugũ ñami Timoteo”, yi tuoia yu mure. Mu ñico Loida, m̄ jaco Eunice cuni m̄ riojuaju ito bajiro Cristore tuorũnyijarã ĩna. “Mu cuni ito bajiroti Cristore tuorũnugũ ñagũja m̄”, yi tuoia yu mure.

⁶ Ito bajiri yu ãmo mure moa jeocati rumu mucana m̄ t̄di tuoĩare ãmoa yu. Ito bajiro yu yicati rumu Diore m̄ moa ĩsi masiroca yiñi ĩ. Itire ãcabojabesa. Wanucõri

queno busa ñre mu moa ñsire ãmoa yu. ⁷ Mani ya usijũ mani tuoña güi ñatoni meje yiñi Dios. Ado bajirojũa yiñi. Mani tuoña oca sēoroca yiñi ĩ. Espiritu Santo manire queo sãcōri queno mani ñre moa ñsiroca yiñi. Gãjerãre mani ti mairoca yiñi. Ito yicōri ñeñarise mani ñemecuti masiroca yiñi Dios. ⁸ Mani Uju Jesucristore busi ejabuagu, “Masare masogũ ñami ĩ. Ñre riti tuorũnu yu”, yibojobesa. Masare Jesucristo oca yu riasore waja ado tubia ecoru ña yu. Ito bajiro yu bajibojarocati, “Pablo ñami yu baba”, yibojobesa. “Pablo ĩ tuoña bujatobitiro bajiro bujagu yiguja yu cuni”, yi tuoña güibes. Jesucristo oca quenarise mu masare riasobojarocati co rumu mu tuoña bujatobitiroca yirã yirãji gãjerã. Ito bajiro ñna yibojarocati mu ñemecuti masitoni mure ejabuagu yiguñi Dios. ⁹ Manire masoñi Dios. ĩ ñarã queno yirã mani ñatoni manire beseñi ĩ. Mani queno yirise ticōri meje manire masoñi Dios. Ñeñaro yirã mani ñabojarocati manire masoñi ĩ. Manire ti maicōri ĩ ãmoro bajiroti manire masoñi Dios. Adi macãrucãro ĩ rujeoroto riojũa manire masi yucōri manire ti maiyiju Dios. “Yu Macu Jesucristo ĩ godarotina suoriti ñnare masogũ yiguja yu”, yi tuoña yucãyiju Dios. ¹⁰ Adi sitaju wadicōri mani Uju Jesucristo ĩ manire goda ñsirena suoriti, “Manire ti maiami Dios”, yi tuoña masia mani, adi rumuri ĩja. Godabojaguti tãdi Jesucristo catijare, ĩja mani godarotire güibe mani. “Cristo oca quenarise mani tuorũnuja mani catitĩñaroca yigu yiguñi”, mani yi masiroca yami ĩ.

¹¹ Iti oca yu masare goti rēto butoni yure cũni Dios. Judio masare meje Cristo oca yu riaso ucutoni yure cũni ĩ. ¹² Iti oca yu riasore waja ado tuoña bujatobiti ña yu. Yu tuorũnugũre ñre queno masia yu. Ito bajiri ado tubia ecobojaguti bojori bujabea yu. Yure tirũnugũ yiguñi ĩ. Ito yicōri, “Masa ñeñaro yirise waja ĩ seniri rumu yure masogũ yiguñi”, yi masia yu.

¹³ Oca ñasarise mũare riasocu yũ. Iti oca yũ mũare riasocati riaso jidicãbesa masare. Jesucristore tuorũnu jidicãbesa. Jesucristo ñarã ñacõri ãre tuo mairũja manire. Ito bajiroti gãjerã ãre tuorũnrãre cuni mani maija quena.

¹⁴ ã oca masare mũ riasotoni mũre cũni Dios. Mani ya usiju quedi sãjarũ Espĩritu Santo ã ejabuarisena masare riasoya.

¹⁵ “Asia sita gãna Pablore jidicãni ãna”, yi masigũja mũ. ãna wato ñama yũre jidicãrã Figelo ito yicõri Hermõgenes.

¹⁶ Yũre ãna jidicãbojarocati Onesĩforo wame cutiguama yũre ejabuaquĩ. Ito yicõri yũ oca sẽoroca yiquĩ ã. Tubiara wi yũ ñabojarocati “ãre ti ãmobeã yũ”, yibitiquĩ yũre. Ito bajiri ãre mani Hju Dios queno ã yire ãmoã yũ. ã ñarãre cuni ito bajiroti Dios ã yire ãmoã yũ. ¹⁷ Ado Roma wame cutiri cuto ejacõri yũre bujarocu ãma jidicãbisĩ ã. ¹⁸ “Ado Efesoju Pablo ã ñaroca queno ejabuaquĩ Onesĩforo”, yi masigũja mũ. Yũre ã queno yire waja ãre queno yijaro mani Hju. Masa ãna ñeñaro yirise waja ã seniri rãmũ ãre ti maijaro Dios.

2

Ñemecutiya Timoteo mũ, Pablo ã yire gaye

¹ Tuoya yũ macũ Timoteo mũ. Manire ti maicõri ã ñarã mani ñaroca yĩni Jesucristo. Ito bajiri itire tuoĩacõri oca sãõña mũ. ² Jãjarã masare oca yũ riasoroca tuogocacu ñacũ mũ. Ito bajiri yũ mũre riasogocati Jesure masirãre riasoya, gãjerãre ãna riaso masitoni. Ito bajiro mũ yija gãjerãre Cristo oca ñasarise riasorã yirãji ãna cuni.

³ Jesucristore queno tuorũnugũ ña mũ. Ito bajiri tuoĩa bujatobitibojaguti surara masũ bajiro ñemecutiya mũ.

⁴ ãna uju rotirise riti tuorũnrãji surara. Gãjerã ãna yisotiriseama tuorũnũmenaji ãna. ãna uju rotirise riti cudi ãmorãji ãna. ⁵ Ito bajiroti no ajere gaye rãtocũ ãmogũ, ajere ujarã ãna rotiro bajiro ã cudiya quena. Itire ã cudibeja

ĩ ajere waja bujabiquĩji ĩ. ⁶ Ito bajiroti no weseca moagũ ĩ moare waja cajero iti wese rica bujagu yiguĩji ĩ. Gãjerã riojua bujasuogu yiguĩji ĩ. Ito bajiroti bajija quena. ⁷ Iti oca mure yu gotirise queno tuoĩaña. Itire mu queno tuoĩaja mu tuoĩa masiroca yigu yiguĩji mani Uju.

⁸ Jesucristo ĩ ñare gaye tuoiate mu. Uju ñayoru David wame cutigu janerãbatia janami ñayiju ĩ. ĩre ĩna siabojarocati ĩ tũdi catiroca yiyiju Dios. Iti ña oca quenarise. Ito yicõri iti ña masare yu oca goti rětobure. ⁹ Iti oca masare yu riasore waja ado tubiara wiju tuoĩa bujatobiti ña yu. Ñeñaro yigure bajiro come mana yure siacã ĩna. Come mana yure ĩna siabojarocati Dios ocareama camota masimenaji ĩna. ¹⁰ Ito bajiri ado robojua baja. Dise ruyabeto yu tuoĩa bujatobitiroca ĩna yibojarocati ñemecutigu yiguja yu. Dios ĩ beseana Jesucristore ĩna tuorũnure ãmoa yu. ĩre ĩna tuorũnũja ĩnare masogũ yiguĩji. Ito bajiri ĩ rãca ũmacũju catitĩnarã yirãji ĩna. Itire tuoĩacõri yu tuoĩa bujatobitiroca masa ĩna yibojarocati itire ñemecutigu yiguja yu.

¹¹ Oca riojo ñasarise ado bajiro gotia:

Cristore tuorũnurã ñari mani godaja ĩ rãca catitĩnarã yirãji mani.

¹² Tuoĩa bujatobitibojarãti mani ñemecutija, co rumu ĩ rãca rotirã yirãji mani cuni. “Masibea yu Jesure”, mani yija co rumu, “Masibea yu mure”, yigu yiguĩji ĩ cuni manire.

¹³ “Ado bajiro yiana mani”, mani yiro robo yi jeobitibojarocati ijũama, “Ado robo yicũja yu”, ĩ yiado bajiroti yi jeogu yiguĩji. Riojo gotisotigu ñari ruore oca goti masibeami ĩ.

Queno Diore moa ĩsiña, Pablo ĩ yire gaye

¹⁴ Mure yu gotirise ito gãna mucana tũdi ĩna tuoĩaroca yiya. Ado bajiro ĩnare mu gotire ãmoa yu: “Biyaro mua

oca josarise jidicãtoni yure cũni Dios. Ito bajiri ñasabitire mua tuoia jidicãja quena. Ñasabiti mua tuoia busija, ñe waja ma iti. Ito bajiro mua busija tuocõri, tuo wisarã yirãji mware tuo coderã cuni”, yiya ito gãnare. ¹⁵ Dios ï mure ti wanutoni yiro robo queno ïre moa ïsiña Timoteo m. Ito bajiro m yija ticõri, queno mure wanugũ yiguji Dios. ï ocare queno riasotiya, masare queno m goti rãtobu masitoni. “Diore queno moa ïsia y”, m y masija ï tiro riojo bojobicã yigaja m. ¹⁶ Adi sita gaye riti tuoiacõri ruore oca riasorã rãca tuoia busibesa. Ito bajiro masare riasocõri buto busa ïna ñeñaro y waroca yirã yirãji ïna. ¹⁷ Ruore oca riasorã ïna ruorise cami jogare robo bajiro bajia. ïna ruorise cami joga waro bajiro baj waju iti. Gãjerãre ïna tuoia wisaroca ya iti. Juarã ruore oca riasorã ado bajiro wame cutirã ñama, Himeneo, ito yicõri Fileto. ¹⁸ Oca riojo ñasarisejua jidicãcõri ruore ocajua riasoama ïna. “Godarãre mucana tudi catiroca Dios ï yiri rumu rãtacoaju”, y riasoama ïna. Ito bajiro ïna riasoja tuocõri, coriarã Jesucristore tuorũnurã tuoia wisama ïna. ¹⁹ Ito bajiro ïna riasobojarocati Dios ocama ñeñabetoja iti. ï oca ito bajiro ñatĩñaro yiroja. ï oca ado bajiro gotia: “ï ñarãre ti masiami mani Uju”, y gotia Dios oca. Gaje ado bajiro gotia iti: “No, ‘Jesucristore tuorũnurã ña gua’, yirã, ïna ñeñaro yirisere jidicãja quena”, y gotia Dios oca.

²⁰ Queno tuoia, goti masiore ocana mure gotigu ya y. Wi jajo wiju somotõrori jaje ñaro yiroja. Quenari tõrori ñaro yiroja. Oro wame cutirisena ito yicõri plata wame cutirisena ïna menire ñaro yiroja iti somotõrori. Somotõrori gaje buto quenarise meje ñaro yiroja. Yucuna, ririna ïna menire ñaroja gaje. Iti wi ujũ ñasari masa ïna ejaja ticõri, somotõrori quenarisena bare jeogu yiguji ïnare. Iti tõrorire wanugũ queno codegu yiguji ï. Gaje somotõrorireama quenasabitire co rumu ruayabeto bare

jeo bagu yiguñji. ²¹ No ñasarise Diore moa ïsi ãmogũ ñarocõti ñeñaro ï yirise jidicãja quena. Ñeñarise jidicãcõri Diore riti ï rucubuoja quena. No ito bajiro yigati quenarise Diore moa ïsigũ ña yucãgũ yiguñji.

²² Mamu ñabojaguti gãjerã mamarã ñna ñeñaro yi uyarisere ti cùbesa muáma. Quenarisejua riti yisotiya mu. Diore riti tuorũnu ñasotiya. Gãjerãre ti maicõri queno ñe oca manoti, ñaña mu. Ñna ñeñaro yirise jidicãnajua Cristore riti tuorũnurã rácajua baba cutiya. ²³ Ñeñaro tuoïa busirã ráca baba cutibesa. Ñna tuoïa busirise rocati gaye ñacõri ñe waja ma. “Masa ñna oca josaroca yama ñna”, yi masigũja mu ñnare. Mure ñna seniña josabojarocati ñnare tuorũnubesa. ²⁴ No mani Ujũre moa ïsi ãmogũti oca josagu meje ï ñaja quena. Ado robojua ï bajija quena: Masa jeyarore queno yigu ñaja quena. Queno riasogu ñaja quena. Ñre bajiro ñna tuoïabitibojarocati usirioro ñnare yi codebicu ï ñaja quena. ²⁵ Dios oca ti tudirãre quenoti ï goti quenoja quena. Ito bajiro ñnare ï gotija ñna ñeñaro yirise jidicãroca yigu yiguñji Dios gajea. Ito bajiri Dios oca ñasarise tuorã yirãji gajea. ²⁶ Oca ñasarisere tuorũnucõri quenarisere tuoïarã yirãji ñna. Ñna ñeñaro yirisejũare jidicãcõri rũmúa ujũre rãtocũrã yirãji ñna. Rũmúa ujũre cudigoana ñabojarãti ñre rãtocũrã yirãji.

3

Adi macãrucũro iti jedi wariju gaye

¹ “Adi macãrucũro iti jedi wariju buto josari rumuri ñaro yiroja”, mu yi masire ãmoa yu. ² Ado bajiro bajiro yiroja. Ñna ya rujũre maicõri ñna ya gajeonire cuni tuo mairã ñarã yirãji adi sita gãna. Ito bajiroti ñna ya niyerure cuni tuo mairã yirãji. “Gãjerã rãtoro ñasarã ña gũa. Ñejua ruyabea guare”, yi tuoïarã yirãji masa. Gãjerãre busiturã yirãji. Ñna jacusabatiare cudimena yirãji. Ñnare

queno gãjerã yibojarocati, “Queno ya mua”, yimenaji ãna. Ñeñaro yirã ñari Dios ocare cuni rucubomena yirãji ãna. ³ Gãjerãre ti maibiticõri ñnare ñeñaro yirã yirãji ãna. Gãmeri ti tudirã yirãji. Oca ruo gotiri masa ñarã yirãji ãna. Ñna ñeñaro yi ãmorise ñemecutimenaji. Gãjerãre ñeñaro yi coderã yirãji. Queno yirãre ti tudirã yirãji. ⁴ “Mu babaguti ñagũ yigũja yu”, yi ruocõri, oca menirã yirãji ãna. Ñna ãmoro bajiroti ñeñaro yirã yirãji ãna. “Gãjerã rëtoro ñasarãguti ña gua”, yirã yirãji ãna. Dios ã ãmorisejua yiro õno yirã ãna yi ãmorisejua yirã yirãji ãna. ⁵ “Dios ocare rucuborã ña gua”, yirã yirãji ãna. Ito bajibojarocati, “Dios sigũti ñami rëtoro masigũ”, yi rucubomenaji ãna.

Ito bajiro yirã rãca baba cutibesa. ⁶ Romia queno tuoïamenare, “Dios oca muare goti rëtohuana gua”, yama ãna coriarã. “Bujato baja ñeñaro yirã romia ña gua”, yibojarãti ñeñaro ãna yirise jidicã masimena romiare ãmarã yirãji ruori masa. Ito bajiro bajirã romiare ruorona ãmarã yirãji ãna. ⁷ Dise ruayabeto gãjerã ãna riasobojarisere tuorũnu ãmoama romia ãnaõna. Ito bajiro yicõri Dios oca ñasarisere tuo masibeama ãna. ⁸ Jane mejeju Janes wame cutigu ito yicõri Jambres wame cutigu cuni Moisés ñayoru ti tudicõri ãre cudi ãmobisjarã ãna. Ito bajiro bajirã ñama ruori masa. Dios oca riojo ñasarisere ti tudiana ãna. Ñeñarise riti tuoïama ãna. “Diore tuorũnurã ña gua”, yibojarãti ãre tuorũnurã meje ñama ãna. ⁹ Ito bajiro ãna bajijare, “Rocati ruore oca riasoama ãna”, yi masirãji masa jeyaro. Jane mejeju Janes ito yicõri Jambres cuni ãna ruore ti masiado bajiroti adi rumuri ruorãre cuni ti masirã yirãji masa.

Timoteore Pablo ã rotire gaye

¹⁰ Ñna robo bajigu meje ña Timoteo muãma. Masare yu riasorise gaye queno masia mu. “Ito bajiro ñasotigu

ñami Pablo”, yure yi masia m̄. “Jesucristore tuorũnugũ ñari ã ãmorise riti yi ãmoami Pablo”, yi masigũja m̄ yure. “Masare usirioro yigũ meje, ãnare ti maigũ ñami Pablo”, yure yigũja m̄. “Tuoĩa bujatobitibojaguti Dios oca masare riaso jidicãbisĩ Pablo”, yure yi masigũja m̄. ¹¹ Cristo oca yũ riasojare masa ãna yure usirioro yi codeja ticũ m̄. Yũ tuoĩa bujatobitija ticũ m̄. Antioquia, Iconio ito yicõri Lистра wame cutiri cutoju cuni yure rẽtare ñarocõti masigũja m̄. Iti cutoriju yũ tuoĩa bujatobitiroca masa ãna yure yire masigũja m̄. Ito bajiro ãna yibojarocati mani Uju yure codeñi ã. ¹² No Jesucristore tuorũnũrã queno yi ãmorãre usirioro yi coderã yirãji gãjerã. ¹³ Ñeñaro yirã ito yicõri ruo jairã cuni buto busa ñeñaro yi warã yirãji. Ruore oca gotisotirã yirãji. Gãjerã cuni ito bajiroti ruorã yirãji ãna ruorã ñajare.

¹⁴ ãna bajiro yibesa muãma. Dios oca m̄ riasotire tuorũnu jidicãbesa. “Yure riasogoana oca riojo ñasarise riasocã ãna”, yi masigũja m̄. ¹⁵ Dios oca tutire macuacã ñagũju riasotisũoyija m̄. Dios oca riasotigũ ñari, “No Jesucristore tuorũnugũti, ãre masogũ yiguĩji Dios”, yi masigũja m̄. ¹⁶ Dios oca tuti ucagoana ãna tuoĩa rujeore meje ucayijarã ãna. ãna tuoĩariseju Dios ã gotire riti ucayijarã. ã oca tuti ña mani riasotiroti. Itire riasoticõri oca riojo ñasarise masia mani. Itire riasoticõri, “Ñeñaro yigũ ña yũ cuni”, yi masia mani. “Yũ ñeñaro yirise jidicãcõri, queno ñagũ yigũja yũ”, yi masia mani. ã ocare riasoticõri Dios ã ãmorise quenarise moa masia mani. ¹⁷ “Ado bajiro Diore mani moa ãsija quena”, mani yi masire ãmoami Dios. Gãjerãre quenarise yirona mani ña yucãre ãmoami Dios. Ito bajiri ã ãmorise mani yi masitoni ã oca tuti manire cũñi ã.

4

Timoteore Pablo rotisusare gaye

¹ Tuoŷa Timoteo m̄. Ȳ m̄re rotirise tuoami Dios. Cristo masa jeyarore ti beseroc̄ c̄ni ȳ m̄re rotirise tuoami. Jesucristo ĩ t̄di ejari r̄m̄ catir̄re, godanare c̄ni ti besegu yiguĩji. Ñeñaro yigoana tuoĩa b̄jatomena yir̄ji ĩna. Jesucristore tuor̄n̄r̄ama ĩ rotiroj̄ ĩ r̄ca ñatĩnar̄a yir̄ji mani. Itire masiḡja m̄. Ito bajiri ado bajiro m̄re rotia ȳ. ² Dios oca masare riaso ñasotiya. Masa ĩna tuo ãmoja, ĩna tuo ãmobeja c̄ni oca ñasarise riaso jidic̄besa. “Ñeñaro yir̄ ña gua”, masa ĩna yi masitoni ĩnare riasoya. ĩna ñeñaro yirise jidic̄ ãmomenare goti quenoña. Dios oca masare riasoc̄ri ĩna oca s̄eroca yiya. Coji Dios ocare ĩna tuo masibitibojarocati ĩnare junisinibesa m̄. Usiriobic̄ti ĩnare Dios oca riasosotiya. ³ Oca riojo ñasarisere ti tec̄ri itire masa ĩna tuo ãmobiti r̄m̄ ejaro yiroja co r̄m̄. ĩna ñeñaro yi ãmorise riti yir̄ yir̄ji ĩna. Ito bajiri ĩna tuo ãmorise riasor̄re riti ãmar̄a yir̄ji ĩna. Oca riojo ñasarise riasor̄juare tuo ãmomenaji ĩna. ⁴ Oca riojo ñasarisere jidic̄r̄a yir̄ji ĩna. Masa ĩna ruo gotirisereama tuor̄n̄r̄a yir̄ji ĩna. ⁵ Muáma ĩna bajiro yibeja m̄. Queno tuoĩarise jidic̄besa m̄. Tuoĩa b̄jato-bitibojaḡti ñemec̄tiya m̄. Cristo oca tuoĩamenare riaso uc̄ya m̄. M̄ moaroti Dios ĩ c̄re ñaro bajiroti yiya.

⁶ Ȳre ĩna s̄aroti r̄m̄ jabeto r̄ya. Jesucristo oca masare ȳ riasojare ȳre s̄ar̄a yir̄ji ĩna. Ito bajiri yoari mejeti Dios tu wac̄ yiguja ȳ. ⁷ “Ĩna ñeñaro yirise jidic̄jaro”, yiroc̄ Cristo oca masare riaso josac̄ ȳ. Jeyaro moare ȳre Dios ĩ c̄re ito bajiroti jeoa ȳ. Diore tuor̄nu jidic̄bitic̄ ȳ. ⁸ Ito bajiri ĩre ȳ tuor̄nu jidic̄bitire waja ȳre queno yigu yiguĩji Dios. Queno yigoana ĩna jesari bedo b̄jagu yiguja ȳ c̄ni. Masare ĩ ti beseri r̄m̄ ȳre waja yigu yiguĩji ĩ. Masa ĩna yigoado bajiroti ĩnare ti

besegu yiguñji ĩ. Yũre riti meje waja yigu yiguñji ĩ. No Jesucristore tuo maicõri ĩ tũdi ejari rũmũ bocatirãre cũni queno waja yigu yiguñji ĩ.

Timoteore Pablo ĩ ti ãmore gaye

⁹ Tũoya Timoteo mũ. Yoari mejeti yũre tigu waya. Sejabesa mũ. ¹⁰ Yũ rãca ñabojagu yũre jidicãquĩ Demas wame cutigu. Dios gaye rẽtoro adi sita gayejuare ãmoquĩ ĩ. Ito bajiri yũre jidicãcõri Tesalónica wame cutiri cutoju waquĩ ĩ. Galacia sita gãnare Dios oca riasogu waquĩ Crescenteama. Ito yicõri Dalmacia sita gãnare riasogu waquĩ Tito cũni. ¹¹ Lucas sũgũti ñami yũ rãca. Ito bajiri Marcosre ãmacõri ĩre ãmi waya. Yũ moarise yũre ejabua masiguñji ĩ. ¹² Tĩquico wame cutigũre Efeso cutoju cõacu yũ. ¹³ Wadigu joe sãñado yũ yaro ãmi wadiba. Troas gagũ Carpo wame cutigu ya wiju cũcu yũ. ãmi wadi ĩsiña yũre. Papera tutiri cũni ãmi wadiba. Yũ ya papera tunare mũ ãmi wadisacõre ãmoa yũ.

¹⁴ Alejandro come moari masũ jaje ñeñaro yiquĩ yũre. Yũre ĩ ñeñaro yiadocõti ĩre waja senigũ yiguñji mani Uju. ¹⁵ Roya ĩre, mũre cũni ñeñaro yigu yiguñji gajea. Oca ñasarise mani riasorisere buto ti teami ĩ.

¹⁶ Oca quenori masa tiro riojo, “Ñe seti ma yũre”, yũ yi ejasũocati rũmũ sũgũ yũre busi ejabuagu maniquĩ. Yũ rãca ñabojarã yũre jidicãcã. Ito bajiro yũre ĩna ñeñaro yibojarocati, “Īnare waja senibitijaro Dios”, yi tũoĩa yũ. ¹⁷ Yũ baba mesama ĩna yũre jidicãbojarocati mani Ujuama yũre jidicãbisĩ. Yũ oca sẽoroca yĩni. Ito bajiro yũre ĩ yijare judio masa meje ñarãre oca riojo ñasarise goti rẽtobu jeocu yũ. Yũre ĩna sĩa ãmobjarocati camotañi Dios. ¹⁸ Ũmacũju Dios ĩ rotiroju yũ ejare ãmoami ĩ. Ito bajiri ñeñarise yũ yibe yirocu yũre ejabuagu yiguñji ĩ. Ito yicõri yũre masa ñeñaro yi ãmobjarocati yũre codegu yiguñji ĩ.

Īre rūcubuoṭĩñarujā manire, “Rētoro masigũ ñami”, yirã. Ito bajiro riti ñatĩñajaro.

Quenajaro masa, Pablo ĩ yi ñucare gaye

¹⁹ Quenajaro Aquila ĩ manjo Priscila cuni. Quenajaro Onesiforo ñarã cuni. ²⁰ Mani yagu Erasto Corinto cutoju tujacoami. Mileto wame cutiri cutoju mani yagu Trófi-more cūcu yu, ĩ cōja ticōri. ²¹ “Juebucu riojua busa ĩ tu ejacuja”, yirocu ejori busa waya. Eubulo, Pudente, Lino ĩto yicōri Claudia cuni, “Quenajaro”, yi ñucama mure. Ado gãna mani ñarã Jesucristore tuorũnrã cuni, “Quenajaro”, yi ñucama.

²² Mũ rãca ñatĩñajaro Jesucristo. Mũ ya usijũ oca sēoroca yijaro ĩ. Mũ rãca ñarã ñarocōreti queno yijaro Dios. Itocō ña.

Dios Oca Tuti New Testament in Macuna

copyright © 2012 Wycliffe Bible Translators, Inc.

Language: Macuna

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Macuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06
